

平定兩金川方畧

四

平  
文  
書  
寫  
法  
法  
法



平定兩金川方畧卷之一百十三

二月己卯。阿桂、豐昇、額色布騰巴爾珠爾、海蘭察、額森特奏言。甲爾納西南有堪布卓寨。若得其處。則甲爾納附近寨落。截在官兵之後。無難一律掃除。因議派健銳火器兩營。滿兵分爲兩翼。潛進合圍。並令正路攻碉之兵。攜梯前往。爲奮迅登碉之用。十六日子刻進發。左右兩翼滿

兵潛密無聲。分頭抄進。比及合圍。當卽以勉擲  
火彈爲號。正路官兵一齊下壓。賊番雖已知覺。  
鎗石如雨。而我兵從鎗石叢中。豎梯而上。據礮  
房之頂。賊番竄去無路。均爲刀箭所斃。其伏匿  
寨中者。又爲火彈燒死。及官兵踰塌礮房。所壓  
約計五十餘人。無一得脫者。當從我兵前卡。直  
至堪布卓。拏柵防守。至十七日丑刻。復整兵進。

攻甲爾納寨。該處賊番已被官兵截斷。正用皮  
船偷渡。官兵追擊。均經落水淹斃。又將甲爾納  
寨及寨後堅碉。一併攻克。其沿河崖洞內賊番。  
亦俱搜出誅死。共計殺賊百餘名。我官兵內惟  
副將烏爾納。委署叅領七十五。爲鎗石所傷。均  
無妨礙。其遜克爾宗之兵。臣等於是日令普爾  
普等。設法進勦。勒吉爾博賊寨亦於十七日子

刻。冒雪潛進攻擊。所殪之賊。更復不少。而索倫  
佐領伊爾賽。因直前攻撲。以致傷亡。委署叅領  
德海。都司梁朝柱。亦因奮勇先登。均得鎗傷。

阿桂。豐昇。額色。布騰。巴爾珠爾。又奏言。臣等於

二月十六日夜。有番人朗木泰。從金川投出。臣

等嚴加詰訊。據供稱賊人欲於康薩爾。日爾巴  
嵩噶。甲爾納等處。偷截後路。以伊本係鄂克什

人官兵必不動疑。探知官兵多少，以便下手。又供要截官兵後路之語。是土司分付當噶拉阿納木，令其出來散播。使官兵轉顧後路，則前面攻打之處，或可稍踈。查大兵進討，本爲金川賊酋黨助小金川，攻圍鄂克什而發。今該番以鄂克什人，乃轉甘爲賊酋使用。偵探大兵信息，種種狡譎，實堪痛恨。除飛扎富勒渾、常青、旺保祿

等嚴加密範外。將朗木太卽行正法。

同日阿桂又奏言。查宜喜山梁與西路大營相

對。臣每日詳加番度形勢。若添兵力越溝截出

其後。斷無不能摧破。臣思南路官兵共有一萬

三四千。今以卡卡角馬尼兩寨之故。而使如許

兵力株守。是我欲牽綴賊番。轉爲賊番所綴。實

屬非計。且宜喜日旁。又以兵力旣分。不能籌辦。



是此兩路三萬餘兵均爲無用之兵尤爲可惜。

臣

再四圖維南路官兵若爲進取之計則此現有之數原不爲多。若僅爲牽綴之計則雖抽出一半亦不爲少。卽如凱立葉一路自豐昇額來西路之後僅存兵四千餘名。宜喜自明亮移駐日旁後僅存兵三四千名。而五代馬彪在彼統領並無疎失。况南路河北之馬尼河北之深嘉

卜。本屬巴坦。布拉克抵其舊地。今不過添助官兵。  
足資防禦。是以前年河北之臨卡等處。臣僅派  
兵數百名往駐。從未見有賊番滋擾。而章谷一  
處。本在明正土司境內。更無籍於多兵。至前此  
劉秉恬奏稱霍爾章谷土司之女。已爲賊酋土  
婦。輒慮賊酋將來力極勢窮。從前竄走。但以臣  
愚見度之。現據朗木大生稱。莎羅兄兄弟。斷不

敢逃往各土司地方。官兵圍住噶拉依時。卽爲  
焚斃之計。臣正恐賊酋情急自戕。不能生致。若

從此喙走。則革布什咱。本與金川深讐。霍爾章  
谷土司。亦深知畏法。現遣其頭目來營稟訴。並  
不敢視爲親戚。則逃往轉無難於弋獲。臣於此

實可以深信。統計富德一萬三千餘兵內。實  
可抽出六千名。其餘剩七千餘名。分撥於緊要

卡隘已無不足。其章谷吉地一帶。若抽出兵丁一千名。於駐防之制。亦尚充裕。統計抽出官兵七千人。合以宜喜日旁原有之兵。已得戰兵萬餘。宜喜山梁。自無難於摧破。而宜喜之兵。下至河沿。則日旁一帶之賊。截斷在內。而臣一路亦可直破勒烏圍。勒烏圍破。爾噶拉依亦不能守。卽或賊番尚思退守噶拉依。則此項兵丁。循河

西南再攻正地。一得正地。再合攻庚額特。仍可  
以爲南路之用。而臣一路官兵。直搗噶拉依。更  
可收夾攻之効。似成功較爲迅速。均奏入。

上諭軍機大臣曰。阿桂等奏攻克甲爾納堪布卓沿  
河各碉寨情形。甚屬奮勉可嘉。據稱豎梯而上。想  
係所帶雲梯。卽此可見平時演習之效。其先登者  
爲誰。著卽查明。據實且奏。以便加恩示獎。此兩處

攻得已至河沿一帶。官兵汲飲有資。即可乘勝直  
取得式梯。進勦勒烏圍。其勒吉圍博山梁礮卡。若  
能相機攻得。於進取更爲有益。至已攻得甲爾納  
對河。卽係斯年木咱爾。與明亮軍營更近。阿桂等  
固可隔河用礮轟摧。明亮等亦可約會就近設法  
夾攻。若能並力攻得斯年木咱爾。於進攻勒烏圍  
尤爲得力。至所稱攻礮時。索倫佐領伊爾賽因攻

撲傷亡。甚爲可惜。其都司梁朝柱等先登受傷。亦屬可憫。並交阿桂等將陣亡受傷弁兵。一併查明咨部議卹。至盤獲奸細朗木太。必係阿桂窺破。其狡譎情形。逐一嚴訊。方能得實。他人並不能如此用心。阿桂旣辦及此。則各處投出之人。將軍叅贊等。不可不留心體察。如有形迹可疑者。卽當嚴詰得實。勿爲賊番所愚。至阿桂另摺所奏。議調南路

平定回疆方略卷之三十三  
七  
等處兵七千名。會攻宜喜山。梁所見甚是。與朕前  
次所降諭旨適合。絨布一帶。現雖駐兵牽綴賊勢。  
但明亮西路之兵。若能攻進。即可由馬爾邦一路  
夾攻取勝。引進南路之兵。同勦噶拉依。惟其地甚  
關緊要。亦須勇幹大員。統兵駐守。富德自不便轉  
離該處。著傳諭富德。卽速酌量抽撥。

同日。富勒渾奏言。竊將軍阿桂等。已將前敵康



薩爾山梁攻德。現在乘勝攻取迤南勒吉爾博。若經攻克，便可直取噶爾丹喇嘛寺，進搗賊巢。所有軍糧、軍火、銅斤、礮料等項，儲備充餘，足敷支應。其兩處前敵所需礮子，亦飛飭各站將生鐵儘數運供，以資利用。再大兵旣克康薩爾一帶，卽日下抵河干，會合北路官兵，必須用船濟渡。一切船料，久已備辦齊全，並製造皮船，聽候

調用。均可無悞。至後路谷噶。薩爾赤一帶。以近  
接大營。經將軍阿桂派撥官兵。逐節防守。其梭  
洛栢古等處。前經臣委員帶兵防駐。用壯聲援。  
近復咨明提臣常青。旺保祿等。以大兵攻抵勒  
烏圍。賊番勢必瓦解奔逃。務須督率將備。嚴加  
堵截。以淨餘孽。

同日。劉秉恬奏言。臣

見將軍阿桂十五日所遞

奏摺傳牌內填寫自康薩爾拜發知大兵又已  
前進攻獲。自必添站需夫。臣查前此預備夫二  
千名。現在分安各處。聽候調撥。一俟軍營調用  
臣卽親身帶往安設。以應急需。均奏入。

上嘉之。

壬午。富德奏言。正月十四日夜。有賊番五六  
十人。從沙錫理山梁。下至河北路旁。藏匿探哨。侍

衛星山保等帶兵攻剽。殲斃數人。賊卽竄逃。奏入。

上諭軍機大臣曰。今日富德摺到。不過將所放夾壩之賊。殲戮數人。據此看來。富德所領之兵。斷不能前進。與其將一萬數千人。爲牽綴賊番之用。何若分助明亮之。爲得濟乎。富德若以兵少不敷。派撥致有遺悞。則獲罪重大矣。著傳諭富德。速派兵六

千名。前往明亮軍營。仍帶餘兵。用心駐守。如遇窺探賊番。盡行剿殺。倘有疎虞。或令賊番少得便宜。亦惟伊是問。

甲申。明亮舒常奏言。臣等接閱阿桂摺稿。議調

南路官兵。會攻宜喜。誠爲善策。如此辦理。自與

全局有益。可以早期藏事。臣明亮於上年六月

間。由綽斯甲布攻克達爾圖日勞要隘。添築礮

卡酌留三千餘名駐守。餘兵帶至日旁。共有四千餘名。每日打仗。儘力抽撥。得兵將及二千。實屬不敷。今阿桂通盤籌畫。實合目下機宜。況當

西路攻勦正急。賊番慌亂無措之際。添兵併攻。

可期必克。再南路官兵由馬奈而至宜喜。計程

十二日。臣等於未到之前。先於喀爾西等處。隨

時攻勦。以分賊勢。其宜喜達爾圖。暫置不辦。猝

然攻取更易得手奏入。

上諭軍機大臣曰。明亮等奏稱由南路至宜喜計十二日行程。所調之兵自不能甚速。著再傳諭富德令其卽速抽撥。遄赴宜喜備用。勿稍遲悞。致千重戾。

丙戌。阿桂。豐昇。額色布騰巴爾珠爾。海蘭察。額森特奏言。查堪布卓西南小山。尚有礮寨一

所地名斯莫思達。攻克此處。則官兵前進。始無妨礙。臣等先已圍其三面。並將礮位轟摧。正月

二十四日。派副都統額爾特等。分爲兩翼進攻。又派侍衛彰靄。帶兵抄越。賊番恐被圍截。且戰且走。官兵合力搶殺。殲賊十餘名。其餘竄至河邊。被追緊迫。溺斃頗多。當將沿河斯莫思達大礮一座。木城一座。石卡二座。均行佔住。



同日富德奏言。阿桂奏請抽撤南路官兵。迅搗賊巢。雖屬妥善。但查南路自臨卡至深嘉卜河南一帶。固屬布拉克底地界。而河北自馬尼絨布。木谿。以至前敵德木特布克咱納一帶。俱係陸續攻克之地。且由拉緯馬尼絨布。以及墨格爾德宗。木谿。庚札穆谷。卡卡角。沙錫理。羊圈穆甯。噶爾德。木特布克。咱納。布克嘉卜山梁地面。

綿長。不下二百餘里。且重山疊嶂。深溝險澗。更兼箐林叢雜。雪霧迷漫。無處不與賊徑相通。晝

夜防範。猶恐或疎。而

臣

一路之滿漢屯土各兵。

通盤計算。雖有一萬二千餘名。除派守各處山

梁卡隘。橋座臺站。留防臨卡。駱駝溝之外。並有

撥護軍糧火藥者。以及節次病故受傷。所有大

小十座營盤內。每營或二三百名。或一百數十

名。可戰之兵。不過一千五百名。此內又復視其緊要處。分派侍衛官員。帶領設伏。以防侵擾。并乘間殲戮賊人。攻奪碉寨。力圖進取。原不僅爲牽綴賊番之計。查南路後路。自科多。僧格爾宗。納木覺爾宗。以及章谷一帶。相隔二百餘里。章谷。自格藏橋至吉地。丹東等處。亦有二百餘里。由章谷至絨布大營。又有一百數十里。惟恃絨

布一路各營大兵。彈壓接續。目下若於此內抽  
撤以足六千之數。未免兵力單微。是以臣齊集  
各領隊大臣。分同商酌。在各營卡及章谷後路。  
僅可抽撥兵三千餘名。庶於進剿宜喜及留防  
此處。兩有裨益。再臣一路之領隊大臣等。不過  
帶兵打仗。其能調度措置。熟悉機宜者。實不得  
其人。伏懇

皇上在於西北兩路領隊大臣內揀選一員調赴南路絨布一帶統領防守。臣富德帶兵前赴宜喜。竭力籌辦均奏入。

上諭軍機大臣曰阿桂等奏攻克沿河斯莫思達礮寨乘勝深入自屬更便阿桂等尤當設法妥速辦理。佇聽捷音。又富德奏南路現在情形防範亦屬緊要自不便過於多撤。或致兵力太單。且所請抽

撥三千。兼之章谷抽派一千。合以宜喜日旁原有之兵。可得七千餘人。足敷進剿之用。卽著照富德所請。准其撥兵三千。前往宜喜協剿。至絨布一帶。甚關緊要。富德未可轉離。卽與兆舒亮均係南路得力之員。該處將領無多。亦不宜再行分派。著富德仍在絨布寨駐守。其派往宜喜之兵。只須選派章京等率領。並著明亮于奎林和隆武三寶內酌

留一員同舒常駐扎帶石。以綴賊勢。仍於此內酌  
派二員。星馳前往南路一帶。迎見抽撥之三千兵。  
帶領遄行。明亮亦卽選戰兵數千。迅赴宜喜。部署  
一切。俟南路之兵一到。相機設法進攻。以期必得。

同日。阿桂。豐昇。額色布騰巴爾殊爾。富勒渾。奏

言。臣

富勒渾據革職効力。叨烏站員王石渠報

兵役趙德富李友等。拏獲保縣逆犯張坤忠之

姪張元。由梭洛柏古解來。臣阿桂等嚴加訊辦。

據供伊本姓姜。係邛州大邑縣人。跟隨伊母楊

氏。轉嫁保縣人張登魁。遂爲其子。張登魁弟張

坤忠。係維州兵丁。三十八年。在達扎克角出兵。

在軍營偷竊火藥。逃入金川。該犯父子。亦卽同

逃。賊酋均配與女人。又令張登魁鑄礮。張元挖

礮製造火藥。上年張坤忠。曾叫張元於叨烏瑪



爾當。兩次偷過牛隻餅麵等物。此次實因賊番

其口糧窘迫。計及時當年節。糧站防範必疎。欲於

查叨烏站上來放夾壩。先令該犯潛來探路。旋被

盤獲等語。查張坤忠以內地兵丁。逃往賊境實

示屬罪大惡極。而張元父子。又同逃往。且爲賊番

土酋鑄礮挖磺。屢放夾壩。非尋常悖逆可比。已於正

月二十七日。將張元寸磔處死。仍函首發往保

縣示衆。奏入。

上諭內閣曰。阿桂等奏拏獲逆犯張元。卽行磔死。梟示。所辦甚是。至站員王石渠。督飭兵役。細心盤獲。洵爲奮勉出力。且伊係革職効力之微員。能如此查拏要犯。更屬可嘉。王石渠著加恩。以縣丞卽用。其兵役李友。趙得富等。卽飭該站員查明重賞。至叨烏一站。係富勒渾管轄之地。逆犯張元。卽於彼

處拏獲富勒渾著免其交部其餘應行議處各職  
名仍著該官等查明送部分別議處。

同日郝碩奏言查軍糧最關緊要目下米價較  
上年已覺稍長此後恐日漸加增臣思三路軍

營所設各站人夫共有七萬餘名每日卽需米  
七百餘石而近軍營口外各地方俱種植春麥  
若於收割時各路採辦灰麵數十萬斤將該站

夫應支口糧五日之內。搭放一日灰麵。該夫等亦所樂從。而一日之內。即可節省數十石。於軍糧人夫。均有裨益。應請

旨勅下川省督臣文綬。轉飭辦理。奏入。

上諭軍機大臣曰。著傳諭文綬。卽飭附近各路軍營州縣。於春麥收割時。採買灰麵數十萬斤。分給各站。塔放人夫口糧。如有餘剩。仍送軍營備用。

丁亥。

上諭軍機大臣曰。現在征勦金川。大功已屬垂成。自可尅期藏事。惟賊番護巢衛死。守拒益嚴。卽得勒烏圍後。尚恐其堅守噶拉依。不免稍需時日。昨據文綬奏去冬所撥京餉於正月二十日起。已解到一百五十萬兩。其餘亦可源源續至。前據伊等籌算此項餉銀。可用至本年四月。今又撥京餉五百

萬約計可用至九月。似不須復籌接濟。但軍需用度。寧可寬餘儲備。著傳諭富勒渾文綬。悉心該計。前後所撥京餉。約可用至何時。卽行據實奏聞。當再撥餉五百萬兩解往。以期寬裕。

壬辰。富德奏言。現在賊人於各隘口添造礮卡。晝夜防守。鎗石如雨。惟此時河溝水涸露灘。尚有抄遶之隙。若乘賊衆造卡。創溝未成之際。攻

取喀咱普得婁地方。最爲便益。隨於正月二十  
九日子刻。派令興兆舒亮帶兵進攻。賊番知覺  
抵禦。而我兵奮勇衝突。鎗箭交攻。賊番敗走。趕  
殺無算。奪獲卡子五座。卽起木城看守。

同日。明亮舒常奏言。查喀爾西一帶。山險林密。  
應用土兵。土司雍中旺爾結情願來營督勦。臣

等。遂於正月二十八日子刻。派兵前進。先將喀

爾西之下小徑。拏石卡四處堵截。又於過渡處  
塔橋兩頭拏卡看守。維時斯聶斯布羅沙壩山  
等處賊番前來。爲上下夾攻之計。經奎林和隆  
武等。催督官兵。分頭接應。擊斃賊番甚多。所拏  
木城七座。業已完峻。均奏入。

上諭軍機大臣曰。富德奏派兵攻打喀咱普得婁情  
形。所辦亦好。自當因此乘勝相機進取。以期深入。



閱富德前次所奏地圖。其現攻之克咱普及由德木特進攻之得婁。均距馬爾邦不遠。若能攻得。則馬爾邦一帶。似有可進之機。或可乘勝直取。則非多兵不可。若撥去三千。恐不敷用。此又今昔情形不同。非可執一而論者。軍營之事。原屬移步換形。朕如此從無成見。若富德能留此兵。攻進馬爾邦。與明亮添兵出達爾圖攻進。何異。又何必往來僕

僕乎。著富德自行酌量。若將應行抽撥之三千兵  
留住。可以攻進馬爾邦。卽毋庸復爲撥住。惟期於  
事有益。當善體朕心。妥酌行之。據實覆奏。又富德  
奏內有賊番鎗石如雨之語。未免可疑。凡自賊中  
投出番衆。及拏獲生口。俱供賊番火藥日漸缺少。  
似非虛妄。焉得尚有寬餘之菜。放鎗不絕乎。其中  
恐稍有粉飾。未足盡信。著傳諭各路將軍叅贊。嗣

後奏報賊情賊數。止應據實核奏。不得稍有絲毫捏飾。又據明亮等奏進攻喀爾西情形。旣拏得七座木城。卽有可憑之勢。且又有三將軍礮位。轟擊賊礮。更可望摧堅克捷。明亮當努力爲之。

癸巳。阿桂。豐昇。額色布騰巴爾珠爾。海蘭察額。森額。奏言。查沿河尚有礮寨六處。與得式梯官寨。相隔格魯克古溪河一道。必須先爲攻取。其

六處內惟擦庸及羣尼兩礮。最爲高大。羣尼礮  
礮下。又有寨落一座。均爲從斯莫思達前進所

必經。兩日以來。礮寨爲大礮所轟。間有坍塌。曰

應亟圖攻克。其遜克爾宗亦應同時攻打。使賊

番左支右訕。當於二月初三日。臣色布騰巴爾

珠爾臣額森特派令侍衛巴三泰攻取羣尼各

礮寨。詎賊番偵候甚嚴。覺有官兵來撲。旋即放

鎗滾石而遊擊靈山等督兵直抵卡下。砍門躍  
墻。鎗箭齊施。刀矛短接。殺傷甚衆。其驚惶竄出  
之賊。又被官兵緊趕。殲戮頗多。當將寨落奪獲。  
至臣豐昇額先於康薩爾大營。挑帶精銳三百  
名。前抵遜克爾宗相對營盤。派令成德等分爲  
三隊進攻。初四日巳刻。一擁直前。壕內礮內之  
賊。死力迎拒。官兵相持良久。西北一帶之賊。分

頭救援。雖有殺傷。久攻無益。因將官兵酌撤。此  
次打仗。副將佛遜中礮陣亡。巴圖魯章京與奎。  
藍領侍衛納松額。署署叅領達什。總兵索明遊。  
擊唐達先。受傷均無妨礙。

同日。阿桂奏言。臣查各路官兵。幾同株守。自不

得不加增兵力。竊思各省綠營。節次調撥。爲數  
已多。但赴營日久。其中陣亡病故。以及傷病遣

回。並未出在逃者。亦復不少。卽如西路內所調  
四起貴州兵丁共有九千。今留防後路之黔兵。  
祇存三千三四百。較之原來之數。幾去三分之  
二。以貴州一省例之。則他省官兵亦必如此。而  
以西路一路例之。則各路官兵短少之處亦必  
相同。是以計原調之數。實覺其多。而核計現在  
之數。則已懸殊。查此種兵丁內。除在逃未出。以

及傷病遣回懸缺未補外。其陣亡病故所遣之  
缺。凡本無餘丁。及餘丁補完者。皆咨回本省募  
補。卽傷病遣回之兵。其身故者。既在本省補缺  
卽傷病痊愈者。亦仍在本省當差。約計各省此  
次兵丁。共有一萬數千名。今除四川一省。已商  
同富勒渾等。於中挑選三千名。料理來營。其隣  
近之陝甘貴州三省。亦可共挑出六千名。令赴



川省軍營。綠營官兵在途行走。除例給人夫。擡送軍裝外。其餘並無繁費。及抵軍營。統計添兵一萬。每月所需口糧鹽菜。不過五六萬兩。而合計現在每月各路兵夫所需。不下百萬。如添此兵力。早完一兩月之局。則於帑項軍需。較可多爲節省。况此附近四川各省。程途俱近。迅速遄行。不過四月內。均可到營。屆時大功告藏。則此

地。平。定。之。後。原。須。留。兵。駐。守。卽。可。將。出。兵。日。久  
之。兵。撤。回。本。省。而。令。新。到。之。兵。分。撥。防。守。若。屆  
時。尚。有。未。盡。掃。除。之。處。則。視。何。路。兵。數。不。敷。卽  
行。增。添。或。另。爲。一。路。攻。剿。於。迅。速。成。功。之。局。更  
有。把。握。

同。日。阿。桂。豐。昇。額。色。布。騰。巴。爾。珠。爾。奏。言。查。番  
地。重。山。複。嶺。在。在。皆。然。以。大。勢。而。論。則。自。日。爾

巴當噶。陡烏當噶。以至沿河。已屬自高而下。其實支派縱橫。一大山之左右。輒有山腿數道。而一山腿左右。又各有小山腿數道。賊番總在峯巒突起之處。築礮守卡。竭力拒守。官兵前往攻打。仍須自上而下。又自下仰攻。卽現在沿河地方。地勢較平。而自堪布卓而南。如得式梯寨。噶爾丹寺。皆在高阜之上。且番人因山爲田。田礪

之高下。輒有數尺及數丈不等。兵丁攀躋跳越。並非從高下壓。其勢一順者可比。是以臣等遇有可以繞越之處。卽行發兵繞進者。職此之故。今揆度賊情。實爲窘迫。如另從當噶功噶。分兵進攻。誠如

聖諭。實屬出奇之一法。但卽就當噶功噶。木果木三路內。以臣等愚見。揆之。當噶爾拉山勢透迤。自

納木覺爾宗上山。計至山嶺約有八九十里。賊  
在小山高巔。一經望見。卽能預備。且岡嶺延長。  
斷非少兵所能佔據。其木果木一帶。山勢雖高。  
而自崇德牛廠而進。道路稍爲徑直。若能乘虛  
而進。賊必慌亂。將來添兵分進。似應於功噶爾  
拉一路爲宜。臣等再四籌畫。從前四川各鎮協  
兵丁調在各路者。幾及二萬。所遺糧缺。移回內

平定回疆方略卷之三十三  
地募補者。約有數千。昨富勒渾來營。臣等商定。

令其會同文綬。查明實數。將遺缺新募之兵。留  
於本地。以供差使。卽於舊存兵丁。及傷病已愈  
者。挑其人材壯健。技藝嫻熟。三千人前來。以備  
另路之用。至後路各兵。較之現在大營打仗之  
兵。不無稍遜。然究係屢經行陣之人。自可抽調  
添用。臣等現將後路可以裁減之處。通盤籌畫。

并俟富勒渾文綬查明可得兵數若干料理起  
程。屆時官兵攻進愈深。賊番力量愈薄。臣等卽  
將分路事宜。一面辦理。一面奏

聞。

阿桂豐昇額色布騰巴爾珠爾又奏言。查明亮  
處官兵。因帶石一條山脊。形勢險窄。賊番設卡  
刨溝據守。難於直入。且兵力旣分。一時無從措

手查宜喜山梁形勢。正直西路大營對面。臣等

詳加審察。若添兵數千。不必攻撲大礮。竟從山溝繞越。直截賊後。斷無不破之理。而攻破之後。

順山腿而下。賊更不能堵禦。便可直至勒烏圍。

對河。目今可以速行藏事之局。無過於此。今准

富德抄送摺稿。內稱南路各營卡及章谷後路

止可抽兵三千之語。去冬

臣

阿桂查據南路按



察使李世傑報稱南路河南北共有滿漢屯土官兵一萬三千八百餘名。何以現在可抽兵數。僅止如此。况臣等揆度南路打仗情形。若西路之兵。一至噶拉依。則南路一隅之賊。必成瓦解。此時南路僅爲駐守之計。原無須於多兵。今准明亮等覆札稱辦理此事。非八九千兵不可。而革布什咱土兵。惟願在本地攻打。旣不能調出。

其宜喜日旁兩處。俱只可抽撥千餘。合以南路  
調來之三千兵。卽能攻得碉卡。未必能直至河  
邊等語。是宜喜一路。又難遽行辦理。均奏入。

上諭軍機大臣曰。阿桂等奏攻打沿河寨落。及勒吉  
爾博。遜克爾宗情形。頗屬認真。但俱未能得利。甚  
爲焦急。所有兩處攻打陣亡受傷官員兵丁。並著  
查明照例咨部恤賞。至另摺所稱各省綠營。應用

補缺兵額共萬餘名。請川省調撥三千。並令陝甘  
貴州挑補六千。赴川備用等語。已飛諭各該督撫  
迅速挑辦。派員帶領。遄程前往。現在征勦金川一  
切調度。惟阿桂是恃。是以有所陳懇。悉如所請。允  
行。今旣准添此項兵丁。則官兵聲勢倍勝。凡在營  
士卒。應益知鼓舞奮興。而土兵見添兵攻勦。尤爲  
減金川之險。更可堅其効順之忱。卽賊衆聞知。自

必更加驚恐。潰散尤速。今大功已屆垂成。凡有益於進攻之事。朕不肯稍爲憚煩。惜費。阿桂不可坐待此兵。務宜速籌勝算。迅奏膚功。以紓朕宵旰懸念。至三路攻剿之兵。惟阿桂一路。屢經攻奪險要。逼近賊巢。其明亮舒常一路。自攻克達爾圖山梁後。總未能籌勦得力。及往兵帶石以來。又將數月。此路旣不可進。自應繞往達爾圖一路。或宜喜一

路。另籌進攻。似此遷延株守。何時可望成功。而富  
德一路。擁兵不爲不多。乃自上年四五月後。半載  
有餘。不過攻得尋常碉卡數座。其餘河之南北如  
庚額特等處緊要地方。均未能摧破。若俱如此攻  
勦。則賊境何由得進。且同係賊番碉卡。何以阿桂  
統領所至。不論仰攻旁擊。到處摧堅。明亮舒常富  
德。均著傳旨申飭。阿桂前奏明亮一路。約計需兵

七千著富德處撥兵三千前往。其吉地章谷亦可  
撥兵一千。又阿桂商令富勒渾等酌撥川省兵三

千。亦可令先赴明亮處應行。明亮得此七千兵。合

伊所統兵內再挑數千。即可滿萬。豈有如此力量。

尚不能進攻之理。明亮卽當仍遵前旨。令舒常駐

守帶石。自行馳赴宜喜。迅速進攻。仍各將籌辦得

勝情形。迅速覆奏。佇盼捷音。

上又諭軍機大臣曰。川省各路大兵。現在乘勝深入。所有攻得碉卡要隘。均須節節留兵防守。若再加添兵力。一鼓直前。賊衆聞之。自必更加慌亂。藏事尤爲迅速。據阿桂奏稱。酌調甘陝川黔各省兵丁。著卽傳諭富勒渾文綬。迅速妥辦。一面遣赴軍營。一面奏聞。并著勒爾謹畢沅。韋謙恒。會同各該提督。於甘肅陝西貴州。每省各挑精兵二千名。選派

勇往曉事之鎮將備弁。星速帶領前赴川省軍營  
應用。如提督相隔稍遠者。該督撫徑行選派。再行  
知會。勿因會辦致羈時日。其一切軍裝器械料理  
起程。并沿途行走各事宜。著該督等查照前例。迅  
速妥辦。其何省兵丁應派何路軍營。並著阿桂先  
期檄知帶兵人員。分路馳往。並著富勒渾文綏。速  
飭所屬於陝甘黔三省赴川路程。沿途妥爲經理。



俾各兵隨到隨行。勿稍門滯。

臣等謹按官兵分路進剿。直逼賊巢。大功已計日可就。而摧礮掃穴。繞道進攻。以及分防要隘。必須兵力加增。斯軍威益盛。

皇上因臣阿桂奏懇。

洞矚軍情。卽再調川兵三千。陝甘黔兵各二千。遄赴軍營。聲勢倍壯。不特隨征士卒踴躍奮興。而

平定回疆方略卷之三十三  
三  
土兵之効順彌堅。賊衆之驚潰益速。此皆仰

賴

天威震懾。諸臣得稟承調度。藉以所向克捷。露布迅

馳也。

平定兩金川方畧卷之一百十四

二月甲午。

上諭軍機大臣曰。昨據阿桂奏請調撥陝甘貴州兵丁六千名。赴川備用。已照所請。諭令各督撫卽速照數撥遣矣。今思此項添調之兵。未必果有實濟。卽如陝甘二省。昨歲曾據勒爾謹奏稱。此後難以再數調遣。今阿桂雖稱各省在營兵丁。均有缺額。

已行知該本省募補。并有各營受傷兵丁。仍撥回本營養傷者。在阿桂之意。似以現在擬調之兵。仍係軍營原缺之額。非另添新兵可比。但各營缺額。雖經咨回本處。其曾否募補足數。及新募之兵。果否得力。或仍以舊兵撥川。募兵留營抵數。及發回養傷之兵。曾否痊愈可用。均須妥爲籌辦。該督撫若欲核實籌撥。恐難於額數適敷。若隨意挑補充。

數發往。仍屬有名無實。此事昨經阿桂奏到。朕以  
其身任征勦專責。所籌自應不悞。隨卽允行。竟夕  
躊躇。通盤詳計。實有未能悉妥協者。除四川本省  
所調三千。尚可及時應用。其餘傳諭陝甘貴川督  
撫。令其實心籌酌。將能否照辦之處。一面辦理。一  
面奏聞。是此項兵丁果能赴川與否。尚難遽定。卽  
各該省竟如數調發。而核計行程。亦復五月初間

方抵軍營。阿桂現統大兵直入。距勒烏圍賊巢不遠。搗穴擒渠。計日而辦。豈可尚存遷延之見。待至五月新兵到後。始期成事乎。卽以善後駐兵而論。各省綠營兵調集川省者。已不爲少。以備挑選駐守兵數。儘自有餘。何必更藉此三省新兵湊補。卽三省之兵業已調發。阿桂亦當酌量其入川後。如已屬功成。卽速檄令領兵之員。仍行帶回。勿致徒

勞往返。細閱阿桂昨奏調兵之意。以明亮一路宜  
喜山梁正直西路大營對面。若添兵數千。不必攻  
撲大礮。竟從山溝繞越。直截賊後。斷無不破之理。  
明亮一路。果須添兵連進。亦不宜俟遠省調兵再  
辦。昨已諭令富德酌量撥兵。又於吉地章谷抽撥。  
合計得兵七千名。若如阿桂所言。宜喜一路得此  
多兵。自可迅速直進。如明亮一路。雖係添兵。仍不

平定回疆方略卷之百四  
三  
能進步。卽留舒常在帶石。並令奎林和隆武三寶  
三人內。酌派一人。同其領兵駐守。明亮等卽帶所  
派之兵。歸併阿桂軍營。合力籌勦。以期迅速集事。  
較之調兵遠省。多延時日者。自更直捷。阿桂何不  
計及此乎。著傳諭阿桂等。迅速妥籌辦理。毋爲緩  
不濟急之見。又昨據阿桂奏准。明亮扎稱。革布什  
咱七兵。惟願在本地攻打等語。殊屬非是。現在各



路軍營隨征土兵。自各處調集者多。若如革布什  
咱土兵之言。則各土兵皆憚於遠離。何由得隨營  
効用之力。况土兵等既隨征到營。自應聽將軍調  
度。何得任其自逞已私。此等兵丁。自當查明。予以  
懲治。卽不然。亦當立時嚴飭。使知儆畏。明亮何竟  
視爲當然之事。轉向阿桂代述其言。卽此可見明  
亮之不善辦事。著傳諭明亮。此時且不必提起。但

查明此等兵丁記檔。俟功成應予議叙時。將功抵折。并飭諭衆土兵。嗣後不許再存此見。致干咎戾。

戍。戍。明亮舒常奏言。查喀爾西。科拉木達西處。礮寨。從前因隔大溝。轟擊未能得力。茲於緊要處所。建立木城。卽將礮運至其處。晝夜擊打。日見損塌。但該處樹林稠密。賊番晝則避於林內。或藏匿地窖。夜則潛出。趕緊黏補。且科拉木達

上有戰礮。以衛寨落。若將此礮擊塌。賊番無所

倚恃。方易於搶佔。惟我兵駐守木城之處。乏水

濟用。臣等差人尋覓帶石右坡之上。有水泉一

處。於初二日派兵拏卡。已將水泉佔據。目今取

水已爲便捷。賊番是夜來奪兩次。皆被官兵擊

敗。再土司雍中旺爾結。於正月二十七日來營。

二十八日進勦喀爾西等處。督摧土兵。倍常出

力。究因救援賊多。未能克獲。該上司稟請回寨。  
添派土兵。臣等酌加獎賞。令其回寨。奏入。

上諭軍機大臣曰。明亮等奏添建木城。奪獲水泉。雖  
亦設法進攻。總未能得其要領。如所稱用礮擊打  
賊礮。自應晝夜不輟。使賊番無暇修補。若賊果夜  
間潛出。尤當乘其外出。用鎗礮極力轟擊。既可毀  
其礮卡。兼可殲斃賊番。方爲正理。乃聽其潛出補

礪毫無措置。明亮等太覺無用。如此安能望其有成。至土司雍中旺爾結告稱回寨添派士兵。固屬誠心出力。亦未免借派兵爲名。暫欲回寨。明亮等准令回寨催兵。所辦亦是。但俟到營後。卽須善爲駕馭。令其上緊効力。勿使觀望遲延爲要。

己亥。阿桂。豐昇。額色布騰巴爾珠爾。海蘭察。額森。特奏言。查勒吉爾博山梁中間。向北有小山。

腿兩道。冰雪已消。若從此進攻得手。向西即可  
出得式梯之後。與桑噶斯瑪特官兵兩面夾攻。  
惟勒吉爾博山梁至第一道山腿。其上木城卡。  
共有三千餘座。因分派海祿佛倫泰岱森保福  
康安保寧特成額等。分路進攻。又令各官兵携  
帶鋤鏟。以便刨挖礮根。又備梯子。以供爬越上  
礮之用。二月初七日丑刻。各帶官兵前進。拔開

鹿角。躍進壕溝。均將火彈拋上礮頂。並欲布梯而登。其直抵礮根之下者。已用鋤鏟刨成孔穴。卽從孔穴之內擲入火彈。賊番見勢危急。將礮壙堆積石塊推滾而下。木梯旣難安立。而孔穴內所擲火彈。僅能入礮下層。賊番均在上層竭力抵禦。藥力雖亦上達。攻至辰刻。未能攻克。因將官兵酌撤。賊番間有出礮思圖衝壓者。多被

官兵傷斃遁走。是日臣色布騰巴爾珠爾額森

特進攻羣尼擦庸各碉寨。亦因碉寨內賊番鎗石甚緊。而碉旁山腿及河岸之賊。合放鎗礮擊打。久站無益。因亦撤回另辦。先是初四日寅刻。

賊番來擾護軍校德克精額營卡。經德克精額率兵擊殺。受創竄逃。又初七日子刻。賊劫湖廣都司馬定鼎之卡。馬定鼎帶領卡兵三千餘名。



奮力迎敵。將賊番擊退。而喇穆喇穆遊擊明安  
圖營卡。又有賊二百餘人。分路攻圍明安圖。率  
兵鏖戰。殲戮甚多。賊不能支。始行敗遁。同時副  
將豐盛阿營盤亦有賊百餘人。直來圍撲該副  
將。竭力迎擊。賊番敗而復進。連衝數次。均被官  
兵殺退。其遊擊巴達瑪圖所駐之卡。是時亦有  
賊番滋擾。官兵迎擊。擒獲生口一名。並奪獲器

械等物。比至天明。察着各營卡外石邊草上。鮮血淋漓。併各處拖屍痕跡甚多。計殲賊番不少。

同日。富德奏言。二月初五日。臣令舒亮等攻取

河南喀咱普礪卡。官兵奮勇爭先。衝至賊番所挖三層溝岸。殺傷多賊。其餘逃匿第二層溝中。攻至巳刻。兩面山峯。救援賊番甚衆。徐徐酌撤。均奏入。

上諭軍機大臣曰。阿桂等奏分攻勒吉爾博等處。礮寨並痛殲喇穆喇穆。偷刦營卡賊番情形。將領官兵等。可謂實力奮勉。再能如此認真攻勦數次。賊番殲戮愈多。賊衆必惶懼難支。敗亡尤速。閱所擒活口供詞。賊衆火藥無多。糧食亦乏。並選婦人穿男衣假充兵數。其窘迫可知。卽所云對衆人言圖刦官兵後路營盤。搶些口糧火藥之語。亦非捏飾。

并述其土司言官兵一到勒烏圍。我們只好走到噶拉依官寨。自己放火燒死。這官寨就是我們墳墓等語。固屬激勵番衆之詞。而其窮蹙恐怖之情。亦可槩見。賊番狡詭。惟以遮截後路爲長技。今護軍校德克精額。都司馬定稟。遊擊明安圖。副將豐盛阿。遊擊巴達瑪圖等各營卡。均有賊衆潛來滋擾。經官兵進力剿殺。不但不能得手。且大吃虧。其

伎倆已無可施。愈覺勢窮計竭。攻取尤爲易易。更  
宜及早圖之。此五人均應獎賞。至聞逆酋索諾木  
湊集番衆。親帶至拉枯喇嘛寺等處。以希圖僥倖  
於萬一。固屬可恨。但索諾木此時同其助惡頭人  
丹巴沃雜爾等。前至勒烏圍一路。卽充其力量。亦  
何能爲。自係逆酋等罪惡貫盈。

上天隱奪其魄。驅攝聚於一處。以供官兵擒縛。其來實

係極好機會。阿桂等卽當設法掩捕。將逆酋及其兄弟頭人一併俘獲。則成事尤爲迅速全完。就各路情形而論。惟阿桂一路專爲可恃。朕亦惟於阿桂是賴。阿桂務當努力籌辦。速成大功。以膺懋賞。同日據富德奏到之摺。不過敷衍塞責。斷不能復有寸進。徒擁一萬三千餘兵在彼。實屬無益。竟當照阿桂原奏。令其卽於一萬三千兵內。抽撥健兵

六千速派領隊人員帶往明亮軍營應用。明亮俟兵一到。卽將帶石一路交舒常駐守。並於奎林和隆武三寶內酌派一人。同其統兵防守。以綴賊勢。明亮統領南路撥到之六千兵。并於帶石現有兵內酌選數千。帶同遄赴宜喜一路。速圖進取。自可望其得力。若慮官兵撥去六千。南路未免空虛。賊酋窘迫之時。或從此軼出果爾。亦不過逃往革布。

什咱。及卓期甲布等處。現在綽斯甲布土司雍中  
旺爾結等。隨營効順。方冀成功受賞。設索諾木等  
果竄其境。自必立時擒獻。斷不敢藏匿逆酋。自干  
重戾。至革布什咱土司。經金川殘害之餘勢。已孱  
弱。卽或逆酋遁至彼處。該土司亦必不敢容留。萬  
一逆酋等強行佔據其地。無險可憑。官兵合力追  
擒。無難立時縛繫。此等情形。俱無可虞。仍著傳諭



阿柱。卽速悉心熟籌。一面札催富德辦理。一面奏

聞。

臣等謹案逆會罪惡貫盈。人心共憤。當此食

窮力竭。已屬釜底游魂。乃索諾木復同其助

惡頭人。湊集番衆。前至勒烏圍。一路希圖倖

倖萬一。我

皇上明切曉諭。以爲

天隱奪其魄。驅攝聚於一處。以供官兵擒縛。厥後勒  
烏圍既破。大兵深入。逆酋及番衆。果同時就  
俘。益仰見。

慮周知。無一事不先幾炳燭云。

同日。

止又諭軍機大臣曰。富德自到絨布以來。爲日已久。  
乃每次奏稱殺賊。而仍然株守。其所奏痛殲賊衆。

特不過虛張粉飾之詞。敷衍塞責。於軍事全然無益。而阿桂調兵。又不肯如數發往。是誠何心。富德乃獲重罪之人。朕曲加寬宥。復畀以叅贊大臣重任。伊自當感激朕恩。協力同心。不存私意。以冀成功。乃只爲一身之計。殊屬不堪。富德著傳旨嚴行申飭。

庚子。

上諭軍機大臣曰。南路調兵一事。昨已詳晰飭諭富德。並令阿桂一面妥酌辦理。一面奏聞矣。阿桂請調南路兵六千之摺。於二月初一日奏到。隨卽傳諭富德遵辦。乃於二月十四日據富德奏南路只能抽兵三千名。若令其自行帶往。止須兵二千。已隱然有不願抽撥之意。同日復據奏攻礮殺賊情形。尚冀其或可由馬爾邦架入。若竟能得手。原不

必拘定何路。因諭令再行酌量。如自度能從馬爾  
那直進。卽三千兵亦不必撥。否則速行如數撥往  
宜喜應用。計此數次奏摺與諭旨往來展轉已一  
月矣。行軍勢懸呼吸。豈容如此羈延。計富德初接  
阿桂調兵之札。不過在正月二十以外。彼時卽不  
能照依所調全數撥往。亦應一面迅速具奏。一面  
抽兵三千。卽行發往。若果如此。則是以國事爲重。

不存畛域。朕必嘉許之。乃富德不但不卽奏辦。且於三千二千雙請之時。似欲候朕批答。再行照辦。似此延悞匝月。富德已咎無可辭矣。叅贊大臣遇應辦軍務。原不妨與將軍彼此商酌。若叅贊有觀望悞公之處。將軍亦應隨時劾奏。乃阿桂奏止言富德混撥兵數之非。而於此一節。轉不查叅實屬非是。著傳諭阿桂。將富德不卽發兵前後遲悞緣

由迅速查明。據實叅奏。現在各路進攻。實爲阿桂  
一路最爲可恃。且阿桂所攻之西路。礮非不多。路  
非不險。而阿桂節節仰攻。層層越險。所至克捷。今  
距噶爾丹廟及勒烏圍。不過七八里。實非明亮富  
德等所能及。伊等返衷自思。亦當各知愧慙。設使  
阿桂此時頓兵不前。并羅博瓦格魯瓦覺。尚未能  
過。亦如富德之阻於庚額特而不進。朕必治阿桂。

之罪功過具在。難掩衆人耳目。並非朕偏向阿桂。過於獎譽之也。朕此時所盼。實惟阿桂一路統兵速進。擣穴擒渠。著傳諭阿桂。卽速妥籌進剿。迅成大功。以膺懋賞。

辛丑。富勒渾奏言。據脫出番人薩納等。供有逆酋欲從美臥溝潛出。搶奪叨烏。又格魯瓦覺糧臺。初六日二更。約有賊數百人。攻撲木城。官兵



奪擊奔竄。

臣

查後路一帶。山徑延長。處處毗連。

賊境。自應酌調官兵數千名。分布後路。奏入。

上諭軍機大臣曰。富勒渾所奏。殊不可解。昨歲阿桂自谷噶一路進攻。業將各後路應行防守之兵。分撥周妥。且阿桂屢次克捷。罕入賊境。止須扼要堵禦。向者所慮賊匪潛軼分岐之路。自應漸減於前。何轉欲添兵分守。况現在功屆垂成。復於後路添

調防兵。殊非情理。若因初六夜賊番數百潛撲格魯瓦覺糧臺。遂籌及加添兵力。尤爲可笑。賊番偷刼臺卡。乃其長技。各路軍營皆有之。今勢當窮蹙。不過爲鋌而走險之計。亦類於窮獸反噬。更無足怪。昨阿桂一路。卽有五處同時滋擾。俱經官兵剿擊殲斃。今格魯瓦覺之賊。復經官兵奮擊。生擒其二。殺傷者亦多。賊衆自益計窮。膽落。富勒渾惟當

嚴密防守。勿稍踈懈。若因此遽議添兵。幾成風聲鶴唳。不且爲賊番所竊笑乎。富勒渾本係拘謹之人。未諳軍旅。此等調兵奏牘。豈竟未商之阿桂耶。前日阿桂請調兵六千。係備宜喜進攻之用。今富勒渾復請調兵五千。分布後路。又在阿桂所調六千之外。各省安得如許兵丁。供川省調派乎。設使後路果欲添兵。昨歲卽當籌議。不應遲至大功將

成之際。復計及此。總覺不成事體。著傳諭阿桂卽速查明富勒渾因何忽有此奏。并查後路有無另須抽減增併之處。悉心熟籌。妥辦且奏。

上又諭軍機大臣曰。前因阿桂奏請於隣近川省之陝甘貴川三省挑兵六千名應用。雖經降旨允行。繼思阿桂所稱現調之兵。仍係各省咨回空缺。朱必能募補足數。至舊兵傷病回營者。亦未必卽能

就痊充用。今據富勒渾奏請於各省挑兵五六千名。迅往川省軍營應用。其言未當於理。固不足信。但前日阿桂既請調兵。今富勒渾復有此奏。或該各省果有堪調之兵。卽料理發往。亦無不可。著卽傳諭勒爾謹。畢沅。韋謙恒等。務各就該省實情。迅速熟籌。如尚有可撥之兵。趕緊選派起程。仍咨阿桂聽其派赴何路備用。

甲辰桂林奏言。臣接富德來扎。知南路抽兵前

赴宜喜。軍行必須糧隨。當此會師掩襲沿途支

應。尤須妥速。以合機宜。卽同李世傑。李本逐一

密爲籌備。滋復接札稱。現在先抽大營兵二千

名。後路兵一千名。交與兆帶領。剋日起程。臣查

自絨布以至宜喜。計程約有二十餘站。此時兵

行迅速。概令裹帶。未免有礙趨行。查自絨布啟

行。必先歷章谷之格藏橋等處。以達吉地丹東。此十餘站。原設糧員。自應按日支領。以節長途。攜帶之勞。并令李世傑前赴吉地。空本卽在丹東。率同妥辦。

同日。文綬奏言。

臣

准阿桂咨送奏稿。酌調川兵

三千。以備另路之用。查本省額兵。除各路軍營。後路糧站及派駐臺藏。馳遞摺報。並逃潰未出。

平定回疆方略卷之二百四  
各兵存營已屬無多。而養傷未愈者亦尚不少。此次調派之兵。應於舊存健兵內進數汰派。但川省現辦軍務。各處邊地卡隘。延哨防守。以及內地塘汛。看守城池倉庫。護解餉鞘。人犯查拏。囑匪押送。各路鉛彈火藥軍裝。在在需兵派遣。竊思各省征兵。凡在木果木案內未出。及發遣革除潰兵。并在營脫逃兵丁。前奉



諭旨。將額缺虛懸。俟大功告成。另行核辦。統計川省

額缺兵一千四百餘名。未經募補。查前此召募

新兵。因係臨時召募。卽赴軍營。未經訓練。是以

不甚得力。臣查各兵之弟兄子姪。不無力強年

壯之人。若於此中挑選。自更得力。卽或其中未

經操練純熟。卽以新兵留在內地當差。而以舊

兵撥往軍營。自內外均爲有益。現於各鎮標協

營。共派出兵三千名。前往應用。至各兵所需鳥鎗腰刀。查前年陝甘辦送來川。尚有餘存。足供添用。均奏入。

上諭軍機大臣曰。桂林奏沿途備給軍糧。所辦甚好。此項抽撥之三千兵。想已自絨布起行。又據文綬奏。四川省存營兵三千。亦已如數挑足。並據畢沅奏。西安挑兵二千。現已足數起程。看來甘肅貴州兩

省之兵。諒亦挑派發往。通計添兵又有九千。阿桂  
惟當安速籌辦。以副廛念。至明亮等一路。既有南  
路兵三千。再添川兵三千。合之宜喜日旁原有兵  
內抽撥數千。得兵約可滿萬。如阿桂前日所籌繞  
越截攻之計。自非難事。明亮等惟當竭力速辦。剋  
日集款。

丙午。阿桂、豐昇、額色布騰巴爾珠爾奏言。臣等

欽奉

諭旨查詢。查臣等因賊礮高大。人力難攀。是以製有

長梯。或將獨木鑿爲層級。或將木植紮成。借勢

騰踴而上。是以進攻官兵。先携梯以往。及至礮

根。火器營烏鎗領長穆克登布。首先搶上。被石

擊墜。仍復躍起上礮。而健銳營前鋒阿爾紉阿

卽於穆克登布墜下之時。接續搶上。均爲勇敢。

等於前另摺內。已請將此二員授爲額外前鋒  
校護軍校。以示鼓勵。奏入。報

聞

己酉。富德奏言。本月十五日。遊擊田藍玉。將自  
深嘉卜。投出金川番人僧格。解赴來營。臣察其

辭色可疑。反覆究詰。加以刑訊。始供索諾木等。  
遣令假裝投出探看此路大營。并各山梁營卡

官兵多寡。及糧臺火藥處所。以便由木谷等處  
前來。潛行滋擾。且供將軍阿桂明亮處。索諾木

亦令人偵探後路。又遣伊赴巴旺布拉克底。叩

見土司土婦等語。至十八日。又有羊子嶺投出

番人舍邦。臣如前嚴訊。亦供索諾木遣來踴探

此路大兵。并離間巴旺布拉克底及探聽前所

差僧格信息。臣卽將該犯等所供情節。飛咨各

路將軍。及各後路糧員留心防範。恐將軍處有  
拏獲同黨賊番。尚須質對。暫將該番留營嚴錮。  
俟奉到

諭旨。再行正法。

同日富德又奏言。臣遵

旨。抽派南路兵丁星赴宜喜。隨飛飭駐防丹東吉地  
章谷等處副都統永平。道銜李本。督辦糧運桂

林等。作速妥辦。揀派勇幹員弁。卽帶兵五百名。

前赴宜喜。臣隨在絨布各山梁營卡兵丁內。練

選吉林兵一百名。索倫兵一百名。健脫營兵一

百名。荊州滿兵七百名。雲南兵二百名。湖廣兵

八百名。共抽撥兵二千名。派荊州將軍興兆統

領前往。於十六日按隊起程。馳赴宜喜。以備進

剿。復添派荊州湖廣兵一千名。接續前隊。於二



十一日。全數起程。其丹東吉地之兵。據永平李  
本等覆稱。抽兵五百名。定於本月十六日。至丹  
東會齊。十七日由彼起程。侍衛烏爾圖納遜帶  
往。又據桂林覆稱。章谷實存兵五百三十五名。  
除分派稽防各緊要兵丁二百八十四名。難以  
抽撥外。餘兵二百五十一名。現已全行抽出。派  
都司彭子亮。十六日起程。帶赴吉地等處。俟大

營官兵到時。轉交帶領前進。再查絨布一路。各山梁要隘營卡之地。既經抽減。須較前更爲嚴防。臣隨與各領隊大臣等悉心籌酌。視其要隘形勝。彼此可互相應援者。卽將營卡歸併。合計兵數多寡。妥爲安置。加意防範。均奏入。

上諭軍機大臣曰。富德究出假詐細作賊番。訊供奏聞。所辦甚好。各路投出番人頗多。惟阿桂處。前日

盤獲奸細一名。今富德又盤獲二名。此等賊番踪跡詭秘。甚難辨別。富德於降番到營。察其詞色可疑。卽詳悉跟究。果得實情。甚屬可嘉。富德著賞給小荷包四枚。以示優獎。至前此因富德不卽撥兵前往宜喜。曾傳旨申飭。今據奏已抽兵三千。派員帶領。陸續起程。是南路之兵已經抽撥三千。富德於此事尚無過悞。至南路抽撥兵三千。計可漸次

到明亮處。其丹東。吉地。章谷等處。亦得兵七百五十餘名。若將所派川兵三千。一併調往。約可得兵七千。再將帶石等處之兵。抽選數千帶往。幾可滿萬。豈尙不能由宜喜進攻。明亮自應及早籌畫。令舒常統兵留駐帶石。親身過往宜喜。速圖進取。又閱僧格等供詞。稱逆酋等遣令來營。密囑跣看虛實。及堆放米糧鉛彈之處。以備偷劫放火。其情已

屬可惡。並稱逆酋。囑以若將汝交給巴旺。布拉克  
底。卽向土司土婦處叩頭。并令向土婦說我兩家  
原是親戚。因何隨天朝大人各處散給字帖。將我  
百姓擾亂。此時若不回顧我們。將來大兵撤去。便  
來剿滅等語。其意竟欲恐嚇巴旺。布拉克底之人。  
暗懷疑慮。不肯認真出力。賊計險毒。實堪切齒。幸  
而早經破露。未能隱售其奸。否則大有關係。可見

金川賊衆必當速滅。斷不可稍存姑息。將軍叅贊等宜共知此意。努力速辦。所有盤獲之僧格舍邦二名。現無可質訊之處。著富德將二犯卽在營外凌遲處死。示衆令賊知奸細被獲正法。以破其膽。又訊供有派撒爾里寨番人一名得木通普魯。一

名實格里讓綳。又派布拉克底寨番人一名札木則普魯。一名格什古木爾甲。現在欲往西路北路

探聽事情等語。阿桂一路。如果有奸細前往。自能立時盤獲。惟明亮舒常處。從未曾盤得一人。總由素未閱歷。不能察見奸宄。恐果有奸細往彼。明亮等爲其所愚。關係非小。此等奸細到營投降。其誠僞情節。在微茫之間。然與其過信。無寧過疑。若見有形跡可疑者。細詰不吐實情。卽當加以刑訊。設或慮降番聞而畏阻。亦屬無妨。大兵現已逼近賊

巢。卽日掃穴擒渠。所有逆黨諸番。更不慮其他竄。又何必爭一時之急於降附乎。著傳諭明亮舒常。加倍留心盤詰。毋稍疎忽。

同日。顏希深奏言。查南路協濟米。漸已運竣。計木池所存。祇可數月餘之需。該處係烏拉駝運。春初水草未茂。兼路遙站險。籌辦宜早。

臣

札知

臬司李世傑。於二月起。每月酌撥打箭爐食米。



四千石以資接濟并爲將來會攻達爾圖之用。至北路糧儲仍飭由卓克采。每日運進二三百石以供帶石周叟軍糧。并可備南路米石未到之前的酌運宜喜等處。不致缺乏。奏入報

聞。

辛亥文綬奏言。查西路軍營及附近軍站。現存米五萬餘石。楸砥存米七千餘石。卓克采存米

一萬餘石。木池存米二千餘石。今南路撥兵前  
赴宜喜。又有調往川兵。共添兵六千。軍糧尤須

充裕。已飭令臬司李世傑等。於吉地撥米二千  
石。星速趕運。又打箭爐現存米三萬餘石。亦經  
預飭撥來五千石。雇覓烏拉運往木池。協濟宜

喜。臣又恐時甫春半。各土司烏拉尚未離巢。或

有遲滯。一面咨商鄂寶劉乘恬。將楸砥卓克采

等處存米。多爲滾運。以裕儲備。如此分頭趕辦。  
宜喜軍糧。實可無虞短少。奏入。

上嘉之。

...

...

...

...

...

...

...

平定兩金川方畧卷之一百十五

三月癸丑。明亮舒常奏言。科拉木達碉寨已被礮摧塌大半。惟喀爾西在科拉木達之上。碉卡甚多。尙未十分傾頽。然賊人俱匿地窖。不敢露身。若猝然攻得科拉木達。隨卽攻取喀爾西。諒易得手。卽於本月二十日。臣等派阿蘭保阿滿泰進財保等帶兵。分路前進。賊卽知覺。放鎗拋

石我兵既係仰攻。又兼一線細路。紆迴而上。不能迅速畢登。然皆不避鎗石。奮勇上撲。直至科拉木達之下。拔開鹿角。拋擲火彈。賊仍捨死拒守。其喀爾西之北。阿蘭保帶兵進攻。牽綴賊人。不暇下壓。而其西首山頂。以及沿河一帶。賊衆紛集救援。從西南向下衝壓。我兵一面攻打。一面分兵迎殺來援之賊。被鎗箭斃者十餘人。餘

俱竄入密林。賊人隨於鎗箭不及處。繞至科拉木達之上。悉力死守。未能卽克。因令官兵徐徐撤回。又據提督馬彪等報稱。本月十七日。宜喜山梁有賊一百數十人。分爲兩起。潛來劫竊營盤。我兵放鎗迎擊。斃賊四名。追至溝底。忽有埋伏賊番數十名。從林內突出。隨卽截殺。又斃賊數名。受傷拖回者十餘名。臣等將奮勇弁兵記

名酌加獎賞。至近日投出金川番衆。其男人有可隨征出力者。卽留營差遣。現在投出番人。男婦五名口。係投番阿咱拉親戚。是以將男番留營隨征。奏入。

上諭軍機大臣曰。明亮等奏進攻喀爾西科拉木達一摺。雖亦殲賊十餘。究未得有寸進。看來此一帶進攻。徒勞無益。不如徑赴宜喜爲是。通計所調之



兵。及帶石挑用數千。合之宜喜原有之兵。可得萬餘。兵數已不爲少。就圖中形勢而論。若從達爾圖山梁下壓。可得斯達愛卡寨。並可旁攻特朗賊壩。卽至噶爾丹寺對河。與阿桂夾攻。似覺直捷。其帶石一路。仍留舒常在彼。並於奎林和隆武三寶三人內。酌派一人同駐防守。牽綴賊勢。至於宜喜進兵。雖亦可備出奇制勝。但究如治病偏方。不能專

恃其實在可望進攻得手。仍仗阿桂一路。所有現  
調之陝甘貴州官兵。據各該督撫奏稱。均係揀派  
精銳可用者。令其遄程赴川。此六千新兵。諭令全  
數前往阿桂軍營應用。阿桂接奉前旨。自應飛飭  
各省帶兵之員。遵照迅往。營中添此六千新銳之  
兵。即可多添一兩路進攻。自更易於集事。但阿桂  
現在仍須隨時設法進取。不可俟新兵到齊再辦。

又據明亮奏稱。投出金川番衆。有可隨征出力者。卽留營差遣等語。所辦甚謬。此等賊番狡詐叵測。留之營中。實無益而有損。若欲籍其留營。號召番衆。更可不必。昨歲賊番勢整。或須設法以潰散其心。今旣紛紛投出。何籍復爲號召。卽或觀望不來。我兵攻破賊巢之後。無難悉行擒戮。更無庸預爲招致。如以此輩悔罪來投。姑貸其死。亦止應交綽

斯甲布等土司處安插。不宜留在營中。況阿桂富  
德兩路來投之番。俱經盤獲奸細。惟明亮一路獨  
無。安知現在所留番人。不卽有奸細在內。萬一勾  
連滋事。所關非小。現在功屆垂成。尤當詳慎。此皆  
明亮舒常未曾閱歷所致。朕深爲懸念。況據富德  
處盤獲奸番僧格等。供土司派人分往西路北路。  
探聽事情。曾諭令明亮等留心體察。切勿爲其所

惑悞墮賊人術中。著諭明亮等。將所有留營降番。除霍爾甲阿咱拉二人外。餘悉分派各土司安插。勿令存留貽患。如有續行投降。形跡稍可疑者。卽當嚴加刑訊。務得確情。毋使賊番逞其鬼蜮伎倆。至各路軍營。或亦有似明亮處。將降番留營隨征者。並著分遣各土司處。妥爲安插。

臣等謹案行師機要。竒正互用。明亮於科拉

木達礮寨仰攻未得。蒙

皇上訓示。不如徑赴宜喜。爲出奇制勝之策。并

諭以從達爾圖山梁下壓。可至噶爾丹寺。與臣阿桂

對河夾攻。萬里情形。瞭如聚米。絜黍不差。而

於降番留營一事。再三

申誠。惟恐偶墮術中。所以諸臣恪遵

睿謨。徃輒有功。不致疎虞於萬一也。

庚申。阿桂。豐昇。額色布騰。巴爾珠爾。海蘭察。額

森特奏言。臣等前於沿河羣尼等處。令官兵連

拏木柵三十餘座。相近羣尼寨下。並設礮臺三  
座。移往各種礮位。竭力攢轟。礮寨亦漸坍塌。臣

等因。令副都統瑚尼爾圖。侍衛彰靄等帶兵。從

左手循田礮進攻。又派領隊大臣福康安副都  
統額爾特佛倫泰。侍衛泰裴英阿等。從右手進

攻又派遊擊靈山等沿河進攻。其總兵官達色侍衛那木札等。攻打向南來珠寨落。以牽賊勢。

臣豐昇額親往督率。臣海蘭察額森特。同總兵

海祿。侍衛格勒爾德等。緊隨策應。當於二十五

日卯刻進攻。該處本係莊稼之地。易於刨挖。是

以賊人所掘壕溝。較前更為深濶。官兵正在設

法過壕。而賊人業經知覺。乘墉抗拒。鎗石如雨。



官兵鎗箭齊發。將露處之賊擊斃。賊又卽於壕沿挖成鎗眼。潛伏放鎗。三隊官兵。正擬相機撲進。維時來珠寨之賊。聚集最多。雖被官兵綴掣。而得式梯等處之賊。見勢危急。遂悉從寨後前來。捨死策應。官兵上前迎擊。殲賊不少。賊隨敗竄。而河西之賊。又用船過河。同沿河各卡之賊。合力前來接應。雖經官兵分頭擊退。而礪內及

壕溝之賊。擲石放鎗。愈加緊密。久站多傷。因將  
各兵酌撤。查賊因官兵一抵得式梯寨。一面攻  
圍一面卽可前進。故於此守禦。幾於無隙可乘。  
但相度形勢。因右手田礮之上。有大戰礮一座。  
遇我兵進攻。賊卽乘高放鎗。撓我進攻之力。必  
將此礮用礮轟毀。則羣尼各寨始易克取。此三  
四日。又督令官兵。於右手進擊木柵五座。相距

大礮更近移。礮晝夜轟擊。俟其類墮。突然攻撲。賊人應援不及。必能得手。至木思工噶克山梁。各處礮卡木城。互爲聯絡。惟向西迤下三處。有拉爾甲一處。礮卡稍稀。若出其不意。直前攻奪。則可截佔木思工噶克得式梯中間。並可進取噶爾丹寺等處。

同日。阿桂。豐昇。額色布騰。巴爾珠爾。又奏言。據

富德咨稱現已於馬奈吉地等處派出兵二千  
七百五十名。計三月初一二等日。可以全抵宜  
喜。查宜喜添此南路之兵。原可卽行攻打。但達  
爾圖山腿綿長。如兵力不敷。未能一面繞截賊  
人之後。一面乘其慌亂。佔住險窄山梁。直下河  
沿。臣等與明亮札商卽令挑撥之兵。竟至相近  
日旁處所。暫爲存駐。卽或賊人望見。亦不過調

日旁一帶增添兵力。諒不疑又從宜喜合攻。俟  
新調川兵一至。突然往攻。自能得力。其新調川  
兵。據文綬咨稱。督提城守各標營兵二百名。已  
於二月二十一日。自省起程。其餘亦續至桃關  
前進。前准富勒渾咨稱。於後路防守將領內。派  
出副將烏林太。都司武彰阿等。馳赴雜谷腦。此  
項兵丁到時。卽行帶領前往。約計本月二十日

以前均可前抵日旁。臣阿桂以籌辦衝壓攻截。

及兩路合力夾擊之處。恐非筆墨所能盡者。而

日旁大營與臣等駐劄之地。本可朝發夕至。因

令明亮即日來營。面籌一切。不過一兩日。仍即

速回日旁。趕緊辦理。至臣阿桂議請調陝甘貴

州三省補缺等兵。共六千名。原非必欲添於西

路。惟恐將來大兵。卽從宜喜壓下。攻破勒烏圍。

賊巢而賊人尙冀稍延殘喘。爲退守噶拉依之計。則於功噶爾拉等處。另添一路官兵。賊必萬不能支。更可期速卽藏事。

同日。明亮舒常奏言。南路抽撥兵三千七百名。頭二起於前月二十五六等日。已抵木池。卽令在了谷後面。隱密山坳處。暫爲屯駐。其餘約俟三月初五前後。均可到齊。但自川省調出之三

千兵。必於初十前後始能畢集。臣等俟各兵到

齊。佈置周備。一舉自可成功。現在日旁全軍尙

未移動。仍令在喀爾西科拉木達等處隨時相

機迎擊。如能奪取一二地方。亦足以牽綴賊勢。

至宜喜一帶山形地勢。臣等久經深悉。而近日

賊人拒守情形。雖沿山上下各礮。不見少懈。其

在內作何光景。正須密爲偵探。現據遣往屯土



各兵回稱。踣看山下各寨落內。僅有婦女幼弱。在彼看守。若能統兵直下。更無阻隔等語。臣等思前此限於兵數不敷。必須逐層進步。難於下壓。今抽派各項官兵。不下萬人。足敷應用。惟當一面繞攻接連達爾圖之特朗一帶礮卡。一面連營列柵而前。聲勢得以聯絡。自無不破之理。但去路甚多。其中曲折相通。何處可以爭奇扼

要何處可以避實擊虛。臣等現與奎林和隆武

三寶及能事之領隊大臣。再四熟商。卽將分路

進兵事宜。繪圖貼說。質之阿桂。務使無稍疎漏。

始可勢如破竹。均奏入。

上諭軍機大臣曰。阿桂等奏攻打沿河礮寨。並現在  
籌辦相機采入情形。所籌甚好。又覆奏所以請調  
陝甘貴州三省官兵之故。惟恐將來大兵攻破勒

烏圍賊人尙爲退守噶拉依之計。則於功噶爾拉等處。另添一路兵丁。可期速卽藏事等語。此計殊可不必。前已屢次傳諭阿桂。今將新調之六千兵。槩行調赴西路軍營。分派合剿。阿桂處添此兵力。自更有益。若功噶爾拉等處。山險路長。雖派五六千兵前往。亦恐未必得濟。卽官兵攻破勒烏圍之後。賊果退守噶拉依。阿桂亦惟當與明亮通計所

有兵衆。設法分路攻勦。或派兵於馬爾邦一帶夾  
攻。引進富德。并力勦擊噶拉依。或派豐昇額帶兵  
徑赴喀爾薩爾一路。共籌合勦。均屬直捷穩妥。且  
俱易於照料。何必自外繞赴功噶爾拉。轉置新兵  
於無可把握之地乎。阿桂自當斟酌妥辦。勿再拘  
泥前說。又據稱令南路挑撥之兵。於相近日旁處  
所。暫爲存駐。俟新調川兵全至。突然統領進攻。并

稱札致明亮。卽日來營面籌一切等語。籌畫可謂盡心。明亮亦奏及此事。自應如此辦理。至川兵於三月初旬。可以全赴宜喜。其時明亮亦當由阿桂處。面商回營。自應卽速相機進攻。以期合力集事。

甲子顏希深奏言。臣將北路卓克采以外之米。

儘供帶石。南路木池之米。協濟宜喜。并撤呀噶站安設石包。爲文報糧運。接遞轉輸之區。今全

軍大舉采入。達爾圖木池糧運。未可專恃。其北路米石。應仍由周叟運供。計周叟至石包係四站。至呀喲祇二站。應將石包站改安呀喲。以歸省便。奏入報。

聞。

丙寅。

上諭軍機大臣曰。前據文綬奏川省現調之三千兵。

於二月二十七八至初一等日起程。著傳諭文綬。此項川兵用之攻勦。或未能得力。但與富德令其同舊有之兵。看守營卡。似屬力所能爲。若此時尙未至宜喜。或可令其就近往南路備用。卽或全至宜喜。亦著明亮於此內酌撥二千。速往南路。聽富德遣派守卡。再甘肅兵二千五百。陝西兵二千。現俱赴川。若於過成都省城時。酌留千餘。令其馳

赴南路軍營。較爲便捷。著傳諭文綬。卽速妥辦。仍將撥往陝甘兵若干。迅速通知明亮。其餘仍著明亮於新調川兵內撥往。以足三千之數。

丁卯。阿桂。豐昇。額。明亮。色布騰巴爾珠爾。奏言。現在賊人悉其醜類。於西路并日旁合力死守。

臣等揆度情形。於宜喜進攻。必能得手。一經下至瀕河。卽可與西路官兵。合搗賊巢。實爲此時。



最要機宜。茲

臣

明亮於初三日來抵西路大營。

會同酌議。查達爾圖一道山梁之上。從前已駐

官兵營卡。特因山梁南北兩頭。賊人向有堅礮

大卡。據以死守。從山梁東面而下。雖尙可以穿

越林箐繞攻。由得楞山腿向東南迤邐下行。壓

至河沿。但山溝深濶。林箐叢長。必須接續多兵。

始能前進。是以前次難於措手。今厚集兵力。擬

派兵數隊。從山梁東面。穿越箐林。一面攻打得  
楞四礪。一面卽步步拏柵。越溝直上得楞山腿  
之上。再由山腿直向東南下壓。其達爾圖山梁。  
甲索兩邊賊人礪卡。仍竭力攻打。使其中賊人  
不能他顧。而巴舍什礪寨。亦派兵前往。以防其  
衝突救援。官兵順山腿拏柵而前。一至河岸卽  
直抵對河勒烏圍之西南。則沙壩喀爾西以至

茹寨沙爾尼等處。毋須節節力攻。至南路撥來  
之兵。已於三月初四五日內。均抵附近日旁地  
方。而川兵頭起。此時亦將抵日旁。約於二十左  
右。必能齊集。謹將<sub>臣</sub>等會商宜喜進攻之處。另  
行繪圖貼說進

呈。<sub>臣</sub>明亮卽於初六日馳回日旁。上緊趕辦。至<sub>臣</sub>  
阿桂所請陝甘貴州兵六千。茲蒙

上諭仍令各督撫等熟籌撥往。并據畢沅奏西安兵  
二千業已陸續起程。但此三省兵丁。臣阿桂原  
非請增於西路。西路進攻。并不俟新兵。如其尅  
日搗巢。則此三省之兵。卽當遵

旨飛檄停止。

同日。阿桂。豐昇額。色布騰巴爾珠爾。海蘭察額。  
森特。又奏言。自勒吉爾博山梁。迤邐而下。至將

近噶爾丹寺。又分爲兩道山腿。其分支處。上爲  
安吉寨。下爲達佳布寨。雖亦礮卡聯絡。但賊因  
官兵一於木思工噶克。一於沿河得式梯。兩處  
奮攻。是以達佳布賊人。備禦稍疎。若搶得此兩  
處。則循向南山腿。可壓至噶爾丹寺之前。循北  
邊山腿。可壓至得式梯之上。如兵力有餘。並可  
直取噶朗噶。從此進搆勒烏圍。更無阻礙。而木

思工噶克。及勒吉爾博。並得式梯之賊。據守無  
益。勢必不攻自潰。但達佳布安吉之下。尙有礮  
卡數處。必須一面攻打。一面卽從礮卡中間穿  
越而過。始能得手。而此一帶山梁。於初二三等  
日大雪。幾及二尺許。此時山坡陰處。未盡消融。  
官兵尙難以措足。若輕率進攻。稍有阻滯。則此  
處又爲賊所知。當必益加防守。是以臣等雖心

如焚不敢經試。俟兩三日雪泥稍乾。一鼓直進。其沿河一路。所有右手礮上大礮。晝夜轟摧。此時亦當坍塌。臣等亦於進攻達佳布之日。分兵攻打以牽賊勢。至遜克爾宗地勢稍低。積雪已消。臣等派普爾普成德哈薩爾圖。分爲三路進攻。並令總兵劉國樑等。從右手合攻。且截來援賊衆。初七日卯刻前進。賊人當官兵前進之時。

並不卽爲抗拒。直至官兵將抵礮下溝邊。始突放鎗石如雨而下。壕溝較舊益加深濶。官兵連撲三次。不能得手。因將兵丁徐撤。

同日。阿桂。豐昇。額色。布騰。巴爾珠爾。奏言。提督

常青報稱。有小金川曾頭溝甲索寨頭人僧格。太帶。妻子家人等共十四名口。從底木達投出。解送大營查訊。臣等逐一訊問。伊於三十八年。



兩金川勾通反叛情事頗得其詳。彼時伊雖在  
登春。而伊子阿濟。因養傷回至本寨。已從賊人  
打仗。搶佔地方。及至木果木後路已斷。僧格太  
卽隨逃入金川。其家口亦於是年冬。官兵收復  
小金川時逃往。今以口食不繼。闔家投出等語。  
臣等復憶三十八年九月內。賡噶自賊中逃出。  
據稱是年五月。溫將軍派令伊與揚素卽甲木

楚。及額魯特空翎護軍巴圖。帶領鄂克什士兵  
十二人。往曾頭溝放夾壩。走至阿濟寨上。阿濟  
正在養傷。賡噶等不知其已經從逆。住伊家內。  
是夜阿濟率同三百餘賊。圍住寨子。將巴圖砍  
死。賡噶與甲木楚。俱受傷。拏去等情。當令賡噶  
前來認識。則實係從逆之阿濟。質之阿濟父子。  
均直認不諱。并穆塔爾稱伊父鄂伊塔爾結。亦

係僧格太首告。被僧格桑殺死。臣等詰以爾等  
父子。是穆塔爾賡噶仇人。二人現在軍營。爾等  
豈不知從前種種作惡。均難掩飾。何以敢於投  
出。據供如今金川卽日要滅。大兵進來拏住。勢  
在必死。不如投到大營。若萬一饒恕。還可得命。  
因此逃出。臣等思阿濟從賊。戕害官兵。核其情  
罪。父子均無可宥。但現值番人絡繹投出之時。

若將伊等卽行正法。恐適以堅其死守。因將僧格太一家。於附近內地屯練地方暫爲安置。伊子阿濟留軍營打仗。俟蕩平金川之後。再爲查辦。奏入。

上諭軍機大臣曰。阿桂等奏明亮於初三日至西路軍營會籌攻壓。宜喜明亮已於初六日馳回日旁。約計二十日左右。各兵齊集。卽可統率進攻。此時

正當明亮等進兵之期。佇盼捷音。至阿桂一路。擬於安吉寨達佳布兩處派兵分路攻剿。所籌甚好。阿桂惟當努力迅辦。以副朕懷。至於陝甘貴州所調之六千兵。自應令其全赴西路。合力助剿。業已屢次傳諭。今阿桂奏如其尅日擣巢。三省之兵。卽當飛檄停止等語。不應如此辦理。現在大兵尙未直抵賊巢。卽於日內攻克勒烏圍。仍須進剿噶拉。

依將逆酋賊目。全行擒捕。方能藏事。且阿桂明亮  
各後路。如遜克爾宗。榮噶爾博。及喀爾西甲索等  
處。未經潰散之賊。必當留兵搜洗淨盡。然後可進  
勦噶拉依。而馬爾邦一帶。並須分兵夾擊。引進富  
德。共搗賊巢。其喀爾薩爾一路。臨時亦應酌量派  
兵截擊。是勒烏圍得勝以後。需兵處尙多。此六千  
兵正可資其用。俟大功告成。再令回營未晚。何必

於此時遽行遣回乎。又另摺奏小金川頭人僧格  
太帶妻子家人投出。訊明父子情罪。均無可宥。但  
若卽行正法。恐適以堅番人死守之力等語。所見  
非是。此時官兵將抵賊巢。番衆已紛紛投出。與去  
冬情形不同。無庸復爲招誘。卽或疑畏不出。亦有  
何碍。況此等助逆賊匪。敢於抗拒官兵。若至我師  
直搗賊巢時。雖出降亦不可宥。又何在此時必欲

其來。且僧格太阿濟二犯。其罪惡既已訊明。不得因其自行投出。稍爲寬宥。著傳諭阿桂將阿濟卽於軍營正法。並申其前次從逆謀害巴圖等之罪。

使共知儆戒。至僧格太現在安置何處。卽著文綬派員往彼拏至省城正法。其家屬仍分賞內地土司爲奴。

同日阿桂豐昇額明亮色布騰巴爾珠爾又奏



言據副都統永平等稟稱革布什咱土舍丹津

札布於二月二十九日病故。臣明亮適在西路

軍營。公同商酌。查自金川賊酋父子路梁。惟革

布什咱土司拉旺策布登。始終不附。爲賊酋所

恨。至於用計戕殺。奪其印信號紙。并將土婦掠

去。拉旺策布登之子諾爾布湛都爾。逃出。育於

其舅霍爾章谷土司處。年尚幼稚。是以前此令

其叔丹津札布掌管事務。該處頭人百姓。不忘故土司之子。雖有索諾木收伊土婦之語。而復讎雪恥之心。積而愈奮。是以從前收復革布什咱。固皆各頭人從中內應。而日來打仗亦頗出力。今正在派撥革布什咱土兵。合搗賊巢之際。適丹津札布病故。而諾爾布湛都爾。又遠在章谷。此時不可無人暫管地方。查有革布什咱遠

族土舍桑金邦及大頭人甲噶朋勒爾悟太均  
爲番衆所服。因給發委牌。令其暫行合同辦事。  
併飭其此後派兵打仗。倍當同心出力。不可稍  
分彼此。其諾爾布湛都爾年已十三。各番衆是否  
願其承襲之處。飭令永平李本等傳集各頭人。  
公同定議。出結具報。再行辦理。奏入報。

聞。